

Despues di casi dos luna sin haya salario

Trahadonan Insel Air Aruba ta pidi gobierno sosten financiero

ORANJESTAD - Empleadonan di Insel Air Aruba ta bayendo pa dos luna sin cobra nan salario. Un grupo a bay Bestuurskantoor ayera y acudi na gobierno pa wak si por haya un sosten financiero.

E empleadonan a pidi pa tres luna di salario cu mas o menos den total lo ta 1.5 miyon florin. "Di nos parti, como compania nos ta den proceso keto bay. Pero di loke nos ta mira awo no ta muestra cu e salarionan ta bay wordo paga", Stephan Spaandonk, hefe di Insel Air Aruba ta bisa Bon Dia Aruba Pa e motibo

ey e trahadonan a tuma e iniciativa di nan mes pa bay acudi na gobierno wak si por haya algun tipo di sosten. Corsou tambe ta den un situacion financiero malo na e momentonan aki segun sr. Spaandonk. Pues for di Corsou nan no por depende pa un sosten na e momentonan aki. "Tin reunionnan pendiente ainda cu nos mester haci cu nan e siman aki."

Varios empleado a bay Bestuurskantoor diaranson merdia y topa cu minister Mike de Meza kende a bin tuma nan peticion. Bon Dia Aruba no a logra haya un reaccion di parti di gobierno pero lo keda sigui

e situacion di pago na empleadonan mientras cu e ta desaroya.

Conflicto laboral

Manera cu nos a informa anteriormente, e cuentanan bancario di Insel Air a wordo confisca pa motibo di un debe di belasting. A dicidi di lanta e confiscacion riba e cuentanan y para pa e findishi despues cu a yega na palabracionnan cu e accionistanan di e aerolinea. Despues un compania a entama un caso den corte pa declara e aerolinea bancarota. Pero hues a duna e compania mas tempo (juni) pa cumpli cu su debenan financiero. Na juni corte lo tuma un

decision si e suspension di pago aki por bira definitivo of no. Corte tambe a nombra un persona (abogado) pa supervisa e proceso awor.

Departamento di Aviacion Civil di Aruba a dicidi di ground e flota di avion na Aruba na januari. Asina mes e compania a perde miyones. Segun e ultimo informacion di nan mes, nan a perde 12 miyon dollar den e prome kwartaal di e aña aki. Na Corsou e compania di avion a kita 250 trahado recientemente. E compania aki si a logra di haya sosten financiero di gobierno di Corsou: 33 miyon florin.

InselAir ta corta ruta, cliente ta keda perhudica



ORANJESTAD - E situacion financiero di InselAir ta afecta clientenan tambe cu a compra ticket riba rutan cu e aerolinea awor a cancela. Manera e compania a anuncia nan a dicidi di corta den nan destinacionnan pa motibo di e problemanan cu nan avionnan.

Sin embargo e servicio pa clientenan cu a book nan vuelo caba, ta laga atras. Manera un cliente J. Quandt ta conta Bon dia Aruba: "Mi a compra un ticket na 2016 unda InselAir tabata tin un promocion pa su di 10 aña di aniversario. Mi a compra mi ticket pa bialha entre maart pa april 2017. Esaki tabata e posibilidad pa cu travel period cu a bin cu e promocion. Mirando cu e fecha ta yegando mi a bay busca informacion dos siman prome cu e vuelo na oficina di InselAir Aruba. Loke mi a haya di contesta ta cu mi vuelo a wordo suspendi y awor mester tuma contacto cu customor relations via e-mail. Te awo mi no haya niun yamada tocante mi ticket y si mi lo haya e placa bek. Esey ta mi preocupacion."

Como cu InselAir no ta bula mas riba e destinacion, e cliente aki ta perhudica.

Bon Dia a tuma contacto cu Insel Air Aruba. E compania ta bisa: "Tur cliente cu keho por pasa na nan oficina y haya mas informacion". Sin embargo experiencia di sra. Quandt ta muestra cu despues di keho na oficina di InselAir, ta haya un papel cu informacion "consecuencia di sus-

pension di vuelo" unda den e papel ta wordo informa cu por declara keho via e-mail. Siguiendo ta haya un 'case number' y pronto lo tuma contacto cu su persona. No ta wordo menciona cuanto tempo lo tuma pa haya un reaccion bek for di e compania. Asina e cliente ta keda den incertidumbre y tampoco por regla su estadia na e pais unda e kier a bay pasa su vakantie.

Mirando e problemanan actual cu ta andando cu InselAir, ta conseha tur cliente pa investiga nan mes si tin vuelo ainda na tur destinacion nan pa asina ta prepara. Ainda no sa cuanto hende por ta den e mes un situacion cu sra. Quandt.

Reaccion di Insel Air

Bon Dia Aruba a puntra Stephan van Spaandonk, hefe di InselAir Aruba pa un reaccion: "Un solucion den casonan asina ta pa yuda e cliente haya un ticket cu un otro aerolinea of cualkier otro opcion cu ta riba mesa. Nos ta percura semper pa busca un solucion pa nos clientenan."

Si vuelonan ta wordo cancela, e responsabilidad di InselAir ta pa sea e cliente ta haya su placa bek, of zorg pa e pasajero lo yega na su destinacion ainda. Pero Sr. Spaandonk ta bisa nos tambe cu: "Tur cos ta depende na e destinacion, ki dia, cuanto tempo etc. Mi ta conseha tur hende cu nan vuelo a wordo cancela y nan tin ticket compra caba, pa bay oficina di ticket di InselAir na aeropuerto y haya mas informacion eyan."